

LPPSA: Terma pinjaman rumah kekal

PUTRAJAYA 15 Dis. - Lembaga Pembiayaan Perumahan Sektor Awam (LPPSA) mengekalkan segala terma dan kemudahan pinjaman kepada penjawat-penjawat awam walaupun berperanan sebagai badan berbentuk pembiayaan sendiri.

Ketua Pegawai Eksekutifnya, Norsimah Ab. Wahab berkata, penjawat awam juga tidak perlu bimbang mengenai kemungkinan syarat pinjaman diubah pada masa depan memandangkan LPPSA merupakan badan berkanun yang dikawal selia dan sebarang perubahan dasar perlu mendapat kelulusan Kementerian Kewangan.

Menurutnya, perubahan status

kepada badan pembiayaan sendiri juga tidak mengekang kemampuan LPPSA yang dahulunya dikenali sebagai Bahagian Pinjaman Perumahan (BPP) untuk menyediakan pinjaman mencukupi kepada penjawat awam.

"LPPSA akan mendapat pembiayaan daripada bank berdasarkan anggaran dana yang diperlukan. Lembaga akan pastikan pinjaman untuk penjawat awam mencukupi," katanya yang merupakan Setiausaha BPP sebelum ini.

Norsimah berkata demikian kepada pemberita dalam majlis pelancaran LPPSA yang disempurnakan Menteri Kewangan II, Datuk Seri

Ahmad Husni Hanadzlah di Kementerian Kewangan di sini hari ini.

LPPSA akan mengambil alih sepenuhnya fungsi pengurusan pinjaman perumahan dari BPP pada 1 Januari tahun depan.

Norsimah berkata, LPPSA pada dua tahun pertama penubuhannya akan menggunakan staf BPP sedia ada yang dipinjamkan dari Kementerian Kewangan untuk memastikan operasi dan segala urusan tidak terjejas.

Beliau juga berharap pertukaran dari BPP ke LPPSA dapat meningkatkan kecekapan badan itu melalui penstrukturan semula yang akan dijalankan.